

Visoki predstavnik na Dubrovnik forumu: Snažan odgovor međunarodne zajednice potreban u BiH



Visoki predstavnik Christian Schmidt učestvovao je u 16. Dubrovnik forumu pod nazivom „Navigiranje globalnog preustroja“ te govorio na panel diskusiji „Zapadni Balkan: Novi euroatlantski zamah“.

Na marginama Foruma, HR Schmidt je održao nekoliko sastanaka, uključujući sa specijalnim izaslanikom premijera Velike Britanije za Zapadni Balkan, Ser Stewartom Peachom, specijalnim predstavnikom EU za dijalog Beograd-Priština i druga pitanja Zapadnog Balkana Miroslavom Lajčakom, visokim predstavnikom EU za vanjske poslove i sigurnosnu politiku Josepom Borrellom, zamjenikom pomoćnika državnog sekretara SAD Gabrielom Escobarom, hrvatskim premijerom Andrejem Plenkovićem, zamjenikom premijera i ministrom vanjskih poslova Italije Antoniom Tajanijem, te direktorom za EU pri Ministarstvu vanjskih poslova Francuske Davidom Cvachom.

Visoki predstavnik i njegovi sagovornici su razmijenili stavove o najnovijim dešavanjima u BiH, a posebno o situaciji u Republici Srpskoj u svjetlu odluka koje je donio visoki predstavnik kako bi zaustavio narušavanje ustavnog poretka Bosne i Hercegovine i Dejtonskog mirovnog sporazuma od strane vlasti RS.

Međunarodni partneri su izrazili punu podršku visokom predstavniku i izvršenju njegovih ovlasti kao odgovor na poteze predsjednika RS Milorada Dodika i drugih koji su neustavni i krše Dejtonski mirovni sporazum, te podrivaju strukturu BiH. Složili su se da je potreban snažan odgovor i zajednički strateški pristup međunarodne zajednice kako bi se zaštitio suverenitet i teritorijalni integritet Bosne i Hercegovine, kao i stepen reformi, razvoja i stabilnosti postignut do sada.